

Beatrijs. Maria legendo el la 13a jc

Vertaald door: Gerrit Berveling

bron

Gerrit Berveling (vert.), *Beatrijs. Maria legendo el la 13a jc*. VoKo, Vlaardingen 1986

Zie voor verantwoording: http://www.dbnl.org/tekst/_bea001beat16_01/colofon.php

© 2012 dbnl / Gerrit Berveling



por Freya kaj Etelka

Antaŭparole

Jen la unua numero en nia serio 'Voĉoj Kristanaj', kiun prave ni povas nomi romkatolika. Ĉar ankaŭ Romkatolikismo estas ero de la bunta tutaĵo, nomata Kristanismo.

Kaj ja estas la ĉefcelo de nia serio, aŭdigi, kiom eble, la plej diversajn voĉojn de nia religio.

BEATRIJS estas mezepoka, nederlanda epopeo malgranda, prave fama nialiterature ne nur pro siaj lingvaj ecoj. Tiujn tie ĉi detaligi ne havus sencon. Krom tio, tamen, ĝi ĉefe disfamiĝis, ĉar ĝi estas tiel 'pura', tiel naive freŝa verko.

Temas pri Maria-legendo. En certa monaĥinejo* loĝas monaĥino, nomata Beatrijs [pr. béatrix], kiu amas junulon jam ekde longa tempo. Ŝi sendas leteron al li por lin inviti, viziti ŝin. Ambaŭflanke de la klostraj bariloj, ŝi interne, li ekstere, ili planas ŝian forkuron. Tiel okazas. Post sep jaroj, dum kiuj al ili naskiĝas du infanoj, li ŝin forlasas en ega malriĉo. Devigite de la cirkonstancoj ŝi eklaboras kiel putino por vivteni siajn idojn: ree sep jarojn. Kiu ne tuj pensus pri la sep riĉaj kaj la sep magraj jaroj el Genezo 41? Post tio ŝi ekpentas, rememorante pri la monaĥinejo kiun ŝi forlasis. Ŝi tien reiras, eĉ reenklostriĝas nerimarkite, ĉar dum ŝia forestado Maria pro ŝia pieco simple transprenis ŝiajn taskojn. Nu, vi mem legu ja la verkon. Ĝi vere estas tre ĉarma.

Kompreneble, teologie oni povus multe diri pri la maniero, laŭ kiu precipe Maria estas adorata. Certe por protestantaj okuloj kaj koroj estas (eble) iom ŝoke, vidi, ke foje okazas preskaŭa intermiksiĝo inter Dio kaj Jesuo kaj Maria: sed eble la mezepoka verkinto serioze opiniis ilin unu sankta familio inter kiuj ni simplaj homoj ne tro akre aŭ klare distingu. Nu, la temon de la Marialogio ni lasu prefere por ia serioza artikolo. Ŝia rolo en la historio de Kristanismo ja tion meritus!

Pri la formo de la verko, mi mallonge iom ŝatus diri. La nederlanda mezepoka poezio distingiĝas per versformo, kutime alterne rimanta, de tre neegala longeco. Ĉiu verso havas po tri aŭ kvar silabojn akcentitajn, inter kiuj troviĝas tute hazarda kvanto da senakcentaj silaboj. Nu, tian verson ni en Esperanto ne konas. Mi anstataŭe uzis pli malpli puran kvarjambon, sen rimoj. Tiel unuflanke mi retenas grandan regulecon [nun verslongece, en la originalo per rimoj], aliflanke konserviĝas daŭra ŝanĝiĝo [originale verslongece, nun pro la nerimado]. Mi esperas, ke ĉi 'solvo' almenaŭ kelkajn kontentigos.

La originalo datiĝas, supozeble, ankoraŭ el la 13a jarcento.

Gerrit Berveling

* per poezia licenco mi uzas sendistinge 'klostro' kaj 'monafi(in)ejo'.

Beatrijs

Verkado ete enspezigas.
 Oni konsilas ke mi ĉesu,
 la cerbon per ĝi ne elĉerpu.
 Sed pro la gracoplen' de tiu,
 kiu patrin' kaj virga restis,
 mi entreprenis ĉi miraklon,
 sen dub' de Dio plenumitan
 por laŭdi Ŝin kiu Lin nutris.
 Mi ekas jen pri monaĥino
 poemon. Donu al mi Dio,
 ke mi la kernon trafe diru
 kaj ke mi bonan finon verku,
 precize laŭ la okazaĵoj,
 kiujn rakontis frato Ghijsbrecht,
 enklostriĝinta Vilhelmano.
 Li trovis ĝin en siaj libroj,
 li estis aĝa, saĝa homo.
 La monaĥin', pri kiu temas,
 aristokratis, distingita,
 ne eblus trovi plu eĉ iun
 al ŝi similan, timas mi,
 laŭ moroj kaj laŭ sinprezento.
 Se mi prilaŭdus ŝiajn membrojn,
 elnombrus ĉiujn la belecojn,
 mi timas, ke ĝi ne tre decus.
 Rakontos mi do, kiun taskon
 ŝi havis longan tempon en
 la klostro de sia vokiĝo:
 'stis sakristianino ŝi.
 Pri tio mi certigas vin.
 Nek lantis ŝi nek lacis ŝi,
 nek nokte nek ĉe taglabor';
 ŝi tuj plenumis ĉiujn taskojn;
 ŝi sonorigis en preĝejo,
 zorgis pri lumo, pri ornamo,
 kaj vekis ĉiujn monaĥinojn.

Ĉi nobelino ne sen amo
 restis. Amo kutimas verki
 miraĵojn ĉie en la mondo.
 Foje de ĉi devenas honto,
 sufer', ĉagreno kaj envio;
 foje devenas ĝojo, bono.
 Eĉ saĝajn faras stultaj ĝi,
 ke ili restu en malĝoj',
 ĉu vole aŭ ĉu kontraŭvole.
 Ĝi tiom kelkajn konfuzigas,
 ke ili dubas pri parol' aŭ
 pri silent': kio ja utilus?
 Plurajn terenĵetegis ĝi,
 kiu ekstaras mem laŭplaĉe.
 Malavarigas amo tiajn,
 kiuj prefere tenus l' aĵojn:
 sed tamen amo disipigas.

Troviĝas krome homfidelo:
al ili, kion donas amo,
ĉio ĉi estas ja komuna:
abundo, ĝojo aŭ ĉagreno.

Ĉi amon nomas mi fidinda.
 Ne ĉion povas mi elnombri,
 ĉar en la rojoj de la amo
 ‘stas tiom da terur’ kaj bono!
 Tial oni ne tro imputu
 la monaĥinon, ke ŝin amo
 ekkaptis forte, seneskape;
 klopodas daŭre la diablo
 por tenti l' homon: frue, tarde,
 tagon kaj nokton, siajn eblojn
 li eluzas senintermite.
 Per falsaj ruzoj li forlogis
 efike ŝin al karna peko:
 la monaĥin' ektimis morti.
 Dion ŝi preĝis kaj petegis,
 ke Li per sia grac' ŝin savu.
 Ŝi diris: ‘Min affliktas tiom,
 kaj vundas, ho! la forta amo,
 (Ĝin scias Tiu, kiu ĉion
 scias: nenio eskapas Lin.)
 ke ĉi sufer' min igas vagi.
 Mi devos vivi novan vivon:
 monaĥan veston lasos mi.’

Nun aŭdu kio do okazis.
 Al la junulo, kiun ege
 ŝi amis, sendis ŝi personon
 leterportantan tre afable:
 Li venu tuj, kiam nur eblos,
 profite estos ja por li.
 Trovis leterportist' la knabon.
 Leteron prenis, legis li,
 senditan de la amikino.
 Li estis ĝoja en la kor';
 rapidis do por esti tie.
 Depost la aĝo 12-jara,
 ĉi ambaŭ amo estris jam,
 do multe ili jam suferis.
 Rajdis plejeble baldaŭ li
 monaĥinejen, serĉi ŝin.
 Eksidis li antaŭ l' fenestro,
 kaj sian dolĉan -lasu do-
 li petis vidi kaj alvoĉi.
 Ne daŭris longe, venis ŝi.
 Vizitis ŝi lin ĉe l' fenestro,
 kiu el stangoj feraj estis
 plektita en la kruca form'.
 Kiom ofte ili suspiris,
 ekstere li, si malekstere,
 forte regate de la amo!
 Kaj tiel longe ili sidis,
 ke mi ne povus vin sciigi
 pri ĉiu ŝanĝiĝ' de l' aspekto.
 ‘Ve mi’ -ŝi diris ofte- ‘Ve mi!
 Karega, mi malgajas tre;
 nur unu-du parolojn diru,

fortigu mian koron vi.
Konsolon vian mi bezonas.
Ama sage trafis la koron,
doloron grandan sentas mi;

neniam plu mi povos ridi,
se vi, karul', ĝin ne eltirus'

Respondis li jen kun fervoro:

'Vi bone scias, dolĉa kara,
ke longe jam toleris ni
ĉi amon, dum la tuta viv';
neniam trovis ni kvieton
por unufoje kisi nin.
Estrin' Venuso, la diino,
kiu estigis tiun senton,
al Dio estu abomena,
ĉar igas Ŝi du florojn belajn
forvelki kaj putriĝi tiel.
Ho, povu mi de vi elpeti,
formeti veston monaĜinan!
Momenton diru vi senriskan,
por ke mi elkonduku vin:
Mi rajdus for, mi tuj preparus
pri vestoj, kostaj, kaj el lan',
per peltoj mi subŝtofus ilin:
mantelo, robo, pluvvestaĵo.
Pro nul danĝer' mi lasos vin!
Kun vi mi pretas ja alfronti
acidan, dolĉan: tutan vivon.
Je Dio, parol' de honoro!'
La junulino diris: 'Kara,
volonte mi aĉeptas tion,
mi kun vi iros tiel foren,
ke scios nul ĉimonaĝeje,
kien ni estos vojaĝintaj.
De ĉi vespero post semajno
revenu kaj atendu min
ekstere tie, fruktarbeje.
Vi staru sub eglanterio.
Atendu min; elvenos mi,
mi estos via novedzino,
mi sekvos vin kien vi volas;
se ne malsano min retenos
nek io malebligos paŝi,
mi nepre tien al vi venos:
do viaflanke, mi vin petas,
vi zorgu esti tie, kara'.

Tiel interkonsentis ili.
Forpaŝis li al la ĉevalo,
kiu selite lin atendis.
Li enseliĝis tre rapide
kaj rajdis for en hasta trot'
tra la kamparo, al la urbo.
Li ne forgesis sian karan:
la postan tagon en la urbo
li serĉis bluan kaj skarlatan,
kaj tajlorigis el ĉi ŝtofoj
mantelon por ŝi kun kapuĉ',
kaj robon kaj eĉ pluvvestaĵon,

kaj ĉion bone substofita!
Neniam oni vidis pelton
pli bonan kiel substofaĵon,
Ĝin laŭdis ĉiuj ĝin vidantaj.

Tranĉilon, zonon kaj monujon
 aĉetis li, bonajn kaj kostajn,
 harligojn, kaj el oro ringojn,
 kaj ĉiuspecajn ornamaĵojn.
 Li informiĝis pri ornamoj,
 kiujn bezonas novedzin'.
 Kaj 500 pundojn li kunprenis,
 kaj li forrajdis ekvespere
 ekster la urbon, tre diskrete.
 Kaj ĉiujn ĉi ornamaĵojn li
 sur la ĉevalo zorge portis,
 kaj tiel iris al la klostro.
 Laŭ ŝia diro, fruktarbeje,
 li tie sub eglanterio
 eksidis en la mola herbo,
 atendi ĝis la kara venos.

Pri li ne nun mi plurakontos,
 prefere pri la belulin'.
 Si sonorigis matutininon.
 La amo suferigis ŝin.
 Post kiam kantis matutininon
 la monaĥinoj junaj, oldaj,
 kiuj loĝadis en la klostro,
 post kiam ĉiuj returniĝis
 por dormi en la dormsalono,
 ŝi sola restis en ĥorejo
 kaj diris tie siajn preĝojn
 kiel ŝi ŝis tiam kutimis.
 Antaŭ l' altar' ŝi genuiĝis,
 kaj diris kun tre granda zorgo:
 'Maria, panjo, kara nomo,
 nun mia korpo ne toleras
 plu porti monaĥinan veston.
 Vi funde konas ĉiuhore
 la homan koron, homajn ecojn.
 Ho kiom fastis mi kaj preĝis,
 ho kiom mi punbatis min:
 sed vana estis ĉiu peno.
 Min terenĵetis nun la amo,
 mi do obeos nun la mondon.
 Samvere, dolĉa Estro, kiel
 Vi pendis inter du rabistoj,
 tordita sur la ligno kruca,
 samkiel Vi Lazaron vokis
 kiu mortinta kuŝis tombe,
 samtiel mian zorgon vidu,
 kaj mian krimon Vi pardonu;
 en egaj pekoj mortos mi'.

Poste ŝi iris de l' ĥorejo
 al statueto, kie ŝi
 surgenuiĝis, kaj preĝadis,
 ĉar tie staris ja Maria.
 Sentime ŝi Marian vokis:
 'Mi tage-nokte lamentadis

ĉe Vi plorinde pri l' dolor',
sed tio tute ne min helpis.
Mi plene perdus la prudenton,
se portus mi plu ĉi vestaĵojn!'

Ŝi sin senigis de l' vestaĵoj
 kaj metis sur Mari-altaron.
 Ankaŭ demetis ŝi la ŝuojn.
 Nun aŭdu, kion faras ŝi!
 Ŝlosilojn de la sakristio
 ŝi ĉe l' Mari-statu' pendigis.
 Kaj jen mi donas la klarigon,
 kial ŝi tien metis ilin:
 por ke, se oni je la primo
 ilin bezonus, eblu trovi;
 ĉar ĉiuhore decas ja,
 pasante la Mari-statuon,
 ke oni alrigardas ĝin
 por diri 'Ave' antaŭ paso:
 'Ave, Maria'; - tial do
 ŝi la ŝlosilojn tien metis.

Ŝi do foriris, povrulin',
 vestita en ĉemizo nura,
 kaj kie konis pordon ŝi,
 ŝi ĝin malŝlosis ege ruze,
 nerimarkite elŝteliĝis,
 kviete kaj sen ajna bru'.
 Ŝi time venis fruktarbejon.
 Rimarkis ŝin jam la junulo,
 kaj diris: 'Kara, ne plu timu,
 amikon jen vi vidas ĉi'.
 Kaj kiam ambaŭ renkontiĝis,
 ŝi jam ekhontis antaŭ li,
 vestite ja nur en ĉemizo,
 kun kapo nuda kaj sen ŝuoj.
 Li diris: 'Bela ho virino,
 vin nepre decus multe pli
 vestaĵoj belaj, bonaj roboj.
 Pro tio ne kulpigu min:
 mi ilin donos al vi baldaŭ'.
 Kaj tie sub l' eglanterio
 li donis al ŝi laŭbezone
 ĉion, je ŝia plensufiĉ'.
 Po du li donis la vestaĵojn:
 'stis blua, kion ŝi surmetis,
 plej bonfarita tajloraĵo.
 Alridis ŝin afable li.
 Li diris: 'Kara, ĉielblua
 konvenas pli ol griza vin'.
 Kaj ŝi surmetis ŝtrumpoparon,
 kaj krome du Kordovajn ŝuojn,
 kiuj al ŝi pli harmoniis
 ol iam la sandalligaĵoj.
 El blanka silko kapkovrilon
 li tiutage donis plu,
 kaj ŝi ĝin metis sur la kapon
 Kaj tiam kisis la junulo
 amplene ŝin sur ŝia buŝo.
 Lin ŝajnis ke tagiĝas jam,
 ĉar tiel brilis ŝia belo.

Li haste pašis al cêvalo.
Li antaŭ si ŝin enseligis,
Kaj tiel ambaŭ rajdis for,
tiel for, ke tagiĝis jam,

neniu ilin persekutis.
 Tiam eklumis oriente.
 Ŝi diris: 'Di', ĉies konsolo,
 bonvolu Vi protekti nin!
 Matenon vidas mi eklumi;
 se ne forkorus mi kun vi,
 mi sonorigus nun por primo,
 kiel antaŭe mi kutimis
 en la plej pia monaĥejo.
 Mi timas, ke pri l' fuĝ' mi pentos:
 malofte nur la mond' fidelas,
 kvankam mi turnis min al ĝi;
 vendiston ruzan ĝi similas,
 kiu komercas brilorajon
 anstataŭ ringojn vere orajn'.

'Ve, kion diras vi, belega!
 Se iam ajn mi vin forlasos,
 min devos Dio akre puni!
 Ni povos rajdi kien ajn:
 pro nul danĝer' mi lasos vin,
 disigos nin nur aĉa morto!
 Kiel vi povas pri mi dubi?
 Neniam vi rimarkis pri mi,
 ke mi 'stas fia aŭ malfida.
 Post ol mi vin elektis mia,
 mi ne plu havis eĉ ekpenson,
 pri Imperiestrino eĉ!
 Se mi eĉ estus je ŝi inda,
 kara, mi ne forlasus vin!
 Pri tio vi ja povas certi.
 Mi 500 pundojn bonkvalitajn
 kunportas da arĝento pura;
 vi, kara, tiujn sola estros.
 Se eĉ ni rajdos eksterlanden,
 nenion devos ni lombardi,
 almenaŭ ne dum jaroj sep'.
 Tiel do trote ili rajdis
 matene ĝis arbara rando,
 la birdoj tie havis feston.
 Sonoron tian ili faris,
 ke ĉie oni aŭdis tion.
 Ĉiu sianature kantis.
 Kaj belaj floroj tie staris
 larĝpetalaj sur verda kampo,
 belegaj estis, bonodoraj.
 L' aero estis klara, pura.
 Multaj 'stis tie rektaj arboj,
 riĉornamitaj foliare.
 La belan la junul' rigardis:
 li daŭre tiom amis ŝin.
 Li diris: 'Kara, se vin plaĉas,
 ni elseliĝos, plukos florojn;
 ĉi tie al mi ŝajnas bele.
 De l' amo ludu ni la ludon'.
 'Ho fi!' -ŝi diris- 'vilaĝano!

Ĉu mi descendu sur la grundon
kiel ulino, kiu monon
akiras fie per la korpo?
Min nepre mankus decosento!

Neniam tion dirus vi,
 se vi ne estus sovaĝulo.
 Ho prave mi bedaŭron sentas!
 Vin punu Dio pro ĉi piano.
 Ne plu menciuj tiun temon,
 aŭskultu l' birdojn en la valoj,
 kiel plenĝoje ili kantas;
 ĉi tempopaso ne malplaĉos.
 Kiam mi estos tute nuda
 kun vi en bonfarita lito,
 vi tiam agu laŭdezire,
 kiel al via koro plaĉas.
 Mi vin koleras en la koro,
 ĉar vi proponis tion nun?.

Li diris: 'Kara, ne kolere,
 Venuso ja instigis min.
 Min Dio punu kaj hontigu,
 se iam ajn mi ekus ree'.
 Ŝi diris: 'Do pardonas mi.
 Vi min konsolas pli ol iu
 vivanta sub la ĉieltrono.
 Se vivus Abŝalom la bela,
 kaj se mi certus, ke kun li
 mi povus vivi eĉ mil jarojn
 en riĉo kaj en kvieteco,
 - min tio kontentigus ne!
 Kara, mi tiom amas vin,
 ne havus sencon eĉ proponi,
 ke iam mi forgesu vin.
 Se mi eĉ loĝus en ĉielo,
 dum vi surtere vivus plu,
 mi nepre venus al vi tie!
 Ho Dio, Vi pardonu, ke
 parolojn mi vortigis stultajn!
 Plej eta ĝojo enĉiela
 valoras pli ol tera ĝoj':
 plej eta tie plenperfektas,
 l' animon homan plej delektas
 kapablo, daŭre ami Dion.
 Ĉio surtera nur mizeras.
 Plene neniam ĝi valoras
 kompare kun ĉiela aĵo.
 Alstrebas tion kiuj saĝas,
 kvankam mi mem ja devas vagi
 kaj vivi en pekeco granda
 pro vi, junulo bela kara'.

Interparolis ili tiel,
 rajdante tra montaro kaj valoj.
 Ne eblas plendetale diri,
 kio okazis inter ambaŭ.
 Do tiel ili pluvojaĝis
 kaj trafis certan urbon, kiu
 situis bele en iu valo.
 Kaj tiom ilin plaĉis tie,

ke restis ili jarojn sep,
kaj ili ĝuis luksan vivon
plezure kun la korpa ĝu',
kaj naskis du infanojn kune.

Sed tiam, post ĉi jaroj sep,
 post kiam foruziĝis mono,
 lombardi ili devis multe
 kion kun si kunportis ili.
 Ornamojn, vestojn kaj ĉevalon
 por prez' duona ili vendis
 kaj ĉiun monon tuj elspezis.
 Sed tiam kion ili faru?
 Ŝi ne kapablis eĉ nur ŝpini
 por perlabori la vivtenon.
 Altiĝis prezoj en la lando
 pri manĝoj, vino kaj biero,
 pri ĉio kion hom' bezonas;
 do multe ili ĉagrenigis.
 Prefere ili mortus tuj
 ol almozpeti pri la pano.
 Disiĝon kaŭzis ĉi malriĉo,
 kvankam bedaŭris tion ambaŭ.
 La viro perdis la fidelon:
 li lasis ŝin en ega peno,
 returniĝante mem hejmlanden.
 Neniam ŝi plu vidis lin.
 Restadis tie apud ŝi: la
 infanoj du treege belaj.

Ŝi diris: 'Tiel do okazis,
 kiel mi timis jam delonge.
 Postrestas kun ĉagreno mi:
 ĉar tiu min forlasis nun,
 je kiu ĉiam fidis mi.
 Maria, ho Estrin', bonvole
 preĝu por mi kaj miaj idoj,
 ke ni ne mortu pro malsato.
 Kion mi faru, povrulin!
 Mi devas korpon kaj animon
 makuli do per pekaj faroj.
 Estrin' Maria, helpu min!
 Eĉ se mi nun kapablus ŝpini,
 per tio mi ne perlaborus
 en du semajnoj unu panon.
 Pro ĉi mizero mi do devas
 ekster la urbo sur kampar'
 per propra korpo monakiri,
 gor ke manĝaĵon mi aĉetu.
 Ĉar kiel ajn, ne povas mi
 infanojn miajn ja malzorgi'.
 Ĉi tiel ŝi ekvivis peke,
 ĉar al ni jen certigas oni,
 ke ŝi sep longajn jarojn vivis
 surtere tiel, laŭ putino.
 Plenumis ŝi multnombrajn pekojn
 (kvankam kun pieja senplezur')
 kiujn ŝi faris per la korpo,
 per kiu ŝi ne multe ĝuis.
 Kaj cion ĉi por eta sumo,
 per kiu l' idojn si vivtenis.

Ja ne utilis ĉion diri:
hontindajn pekojn kaj penadon,
faritajn dum ĉi 14 jaroj!
Sed, ĉu ĉagrena aŭ eĉ plora,

neniam preterlasis ŝi,
ke ĉiutage kun fidelo
sepoje preĝu ŝi Marian;
la Horojn preĝis ŝi, honore
kaj laŭde, pete ke Maria
ŝin liberigu el la pekoj,
kiuj sur ŝi ja tiom pezis
dum ĉiuj tiuj 14 jaroj.
Ĉar al vi jen certigas mi:
sep jarojn estis ŝi kun l' ulo,
kiu generis idojn du
kaj ŝin postlasis eksterlande
kie mizeron ŝi suferis.
Vi scias jam pri l' dua sepo.
Do aŭdu, kiel plu ŝi vivis.
Finiĝis do la 14 jaroj,
jen Dio sendis en la koron
al ŝi pentemon tiel grandan,
ke ŝi prefere lasus tranĉi
la kapon for per nuda glav',
ol plue fari tiajn pekojn
per sia korpo, laŭ kutimo.
Ŝi ploris tage, ploris nokte,
l' okuloj ne sekiĝis plu.
Ŝi diris: 'Ho Maria, kiu
mannutris Dion, ho Fontan',
ne plu toleru ĉi suferojn!
Estrin', mi prenas Vin ateste,
ke pentas mi pri miaj pekoj,
ke ili min ĉagrenas tre.
Tiel multnombras, ke mi scias
ne plu, kie mi pekis kaj
kun kiu. Ve! Kompatu min!
Mi prave timas Lastan Juĝon
(Ne vidas mi, kion Di' vidas)
ĉar ĉiuj pekoj malkovriĝos
(ĉu riĉa kulpas ĉu povrul')
kaj ĉiun krimon Dio venĝos,
pri kiu oni ne konfesis
antaŭe jam kun pentofaro;
ja certe, tion scias mi!
Do tial ege timas mi.
Se portus mi eĉ haran veston,
kaj rampus kvazaŭ kvarpieda
en ĝi de lando mi al lando,
vestita lane, kaj sen ŝuoj,
mi tamen ne povus akiri,
de l' pekoj liberiĝi, sen,
Estrin' Maria, helpo via!
Fontano super ĉiu virto,
jam multajn feliĉigis Vi:
pruviĝis ĝi ĉe Teofilo.
Li estis unu ĉefpekulo,
fordonis al diablo sin:
l' animon samkiel la vivon,
li estis plene ties sklavo;

tamen, Estrin', Vi savis lin.
Kvankam mi estas pekulino,
kaj plej mizera fiulin',
vivante jene kontraŭvole,

Estrin', memoria, ke mi preĝis
 la preĝojn por honori Vin.
 Al mi la kompatemon montru.
 Mi estas unu, kiu zorgas:
 bezonas vian helpon mi.
 Pro tio rajtu mi kuraĝi:
 ke ĉiu, nobla Virgulin',
 kiu tagtage Vin salutas
 'Ave Maria', dankon trovu.
 Kiuj volonte al Vi preĝas,
 tiuj povas certiĝi, ke
 de ĝi al ili venos savo:
 Estrino, tiel plaĉas Vin,
 ho favorata Di-edzinoi
 Vin salutigis via Filo
 en Nazaret, kie Vin serĉis
 l' anĝelo kun mesaĝ' unika,
 kiu antaŭe ne aŭdiĝis;
 tial precize ĉi esprimoj
 sendube al Vi tiom karas,
 ke estas danko Vi al ĉiu,
 kiu per ili vokas Vin;
 se pekojn implikiĝus li,
 ankoraŭ Vi lin gracplenigus
 kaj ĉe la Filo por li pledus'.
 Ĉi preĝon kaj ĉi plendajn vortojn
 la pekulin' tagtage diris.
 Ŝi prenis mane po infano,
 vagadis tra la tuta lando
 de urb' al urbo en malriĉo,
 vivante de almozpetaĉ'.
 Ŝi tiom longe plue vagis,
 ĝis ŝi denove l' klostron trovis,
 kie ŝi estis monaĥino;
 post sun' je vesperiĝo venis
 ŝi tarde ĉe vidvina dom',
 noktŝirmon petis ŝi pro Dio,
 ke tie ŝi la nokton restu.
 'Mi ja ne povas vin forpeli'
 diris vidvin', 'kun ĉi infanoj;
 aspektas ili, ŝajne, lacaj.
 Ripozu do, eksidu vi.
 Ni inter ni dividos ĉion,
 kion provizis la Sinjor',
 pro am' de lia dolĉa Panjo'.
 Do restis ŝi kun la infanoj,
 kaj tre volonte informiĝis,
 kiel en klostro statas ĉio.
 'Rakontu' -petis ŝi- 'vi bona,
 ĉu klostro 'stas de nobelinoj?'
 'Ho jes' -ŝi diris- 'je l' honoro!
 kaj luksa ĝi kaj ege riĉa;
 neniu klostro ĝin similas.
 La monaĥinoj tie ene -
 neniam aŭdis mi eĉ famon
 pri iu ajn malbonon diri,

pri kiu ili povus honti'.

Kaj kiu sidis ĉe l' infanoj,
Ŝi diris: 'Kial tiel diri?'

Ankoraŭ tiun ĉi semajnon
 pri monaĉino aŭdis mi;
 se bone mi komprenis ĉion,
 'stis sakristianino ŝi.
 Ĝin diris viro, sen mensogo.
 Okazis antaŭ 14 jaroj,
 ke ŝi forfuĝis el la klostro;
 neniam pri ŝi diskoniĝis,
 en kiu lok' ekloĝis ŝi'.
 Kaj koleriĝis la vidvino
 kaj diris: 'Klare vi deliras!
 Pri l' sakristianino nepre
 ne diru plu tiajn rakontojn,
 aŭ tie ĉi ne restos vi!
 'Stas sakristianino ŝi
 jam pli ol 14 jaroj nun,
 neniam oni vidis manki
 en unu matutino ŝin,
 krom foje kiam ŝi malsanis.
 Ol hundo multe pli malbonus,
 kiu rakontus krom bonaĵon.
 Animon ŝi havas tiel puran,
 indan je ĉiu monaĥino.
 Eĉ traserĉante ĉiujn klostrojn
 inter la Elbo kaj Garono,
 mi vetas ke ne eblos trovi
 eĉ unu kun pli sankta viv'!
 Ŝi kiu tiel longe vivis
 en pekoj, trovis stranga tion
 ŝi diris: 'Sinjorin', sciigu,
 ŝiajn gepatrojn nomu do!
 Ŝi diris ambaŭ laŭ la nomoj.
 Jam sciis ŝi: jen tio - ŝi.
 Ho Dio, tiun nokton ploris
 ŝi kaŝe antaŭ sia lito.
 Ŝi diris: 'Mi prezentas sole
 plenkoran egan penton nur:
 Estrin', Maria, venu helpi!
 Ho pikas miaj pekoj min!
 Se vidus mi bruladi foron,
 ke flamoj lekus ĝiajn lipojn,
 mi enŝteliĝus tre rapide,
 se ĝi kvitigus miajn kulpojn.
 Ho Di', desperon Vi malamas:
 mi fidas tiun ĉi malamon.
 Mi daŭre plu esperas gracon,
 kvankam pro tim' angoras mi;
 ĝi min kondukas en timegon.
 Neniam tia pekulino
 ekzistis post la Enkarniĝo,
 kiam sur teron venis Vi
 por morti sur la kruca ligno,
 - aŭ savis Vi la pekulinon:
 kiu kun pento serĉis gracon,
 ĝin trovis, eĉ se estis tarde
 ĉar tiel Vi jam klare montris

ce unu el la du rabistoj,
la dekstra kiu pendis kruce;
ja estas tio nin konsola,
ke lin akeptis Vi senpune.

Riparas ĉion bona pento;
 tion rimarkas mi ĉe tio;
 Vi diris: 'Estos vi, amiko,
 hodiaŭ kun Mi en la Regno;
 pri tio Mi certigas vin'.
 Montriĝis, ho Sinjor', klarege,
 ke Gisemasto, la murdint',
 finfine Vin pri graco petis.
 Nek donis oron li nek riĉon,
 li sole pentis pri la pekoj.
 Vian kompaton povas homo
 mezuri same senprobleme,
 kiel facilas unutage
 elĉerpi maron ĝis sekec'.
 Do ne ekzistas tia peko,
 Estrin', ke ĝin ne venkus grac'.
 Ho kial min do ne atingus
 via kompato, se la pekojn
 mi ja bedaŭras tiom forte!'

Surplanke kuŝis ŝi preĝante,
 dormemo kaptis ŝiajn membrojn
 kaj dolĉe ĉi en dorm' forglitis.
 Al ŝi vizio jen aperis,
 ke voĉo klara vokas ŝin
 kuŝantan tie kaj dormantan:
 'Homo, vi tiel longe plendis,
 pri vi Maria nun kompatas:
 Ŝi savis vin per siaj preĝoj.
 Nun iru klostren tre rapide:
 la pordoj staras larĝ-apertaj,
 samhore vi la samajn pasis
 kun la junulo, via kara,
 kiu vin lasis en mizero;
 retrovos vi monaĥajn vestojn
 kuŝantaj ree sur l' altaro;
 vualon, frokon kaj la ŝuojn
 surmetu do trankvile vi.
 Marian danku pro ĉi ĉio.
 Ŝlosilojn de la sakristio,
 kiujn vi ĉe l' statu' pendigis
 la nokton, kiam vi foriris,
 Ŝi tiel zorgoplene gardis,
 ke ĉiujn tiujn 14 jarojn.
 neniu eĉ rimarkis mankon,
 foreston vian eĉ ne vidis.
 Maria estas vin amika:
 Ŝi ĉiam servis viavice
 en pli-malpli via aspekto.
 La Sinjorino de l' ĉielo
 ĝin faris, pekulin', por vi!
 Ŝi nun revokas vin al klostro.
 Neniu kuŝas vialite.
 Mi diras laŭ ordon' de Dio'.

Ne daŭris longe post ĉi tio,

ŝi saltleviĝis el la dorm'.
Ŝi diris: 'Dio ĉiopova,
neniam al diablo lasu,
ke li min puŝos en ĉagrenon

pli ol suferis mi ĝis nun!
 Se nun mi iros en la klostron
 kaj oni prenos min ŝtelisto,
 skandalo iĝos eĉ pli granda
 ol ĉe l' forkuro el la klostro.
 Mi petas Vin, ho Dio bona,
 je via multmerita sango,
 kiu forĝutis el la Flanko,
 se tiu voĉ' kiu min vokis,
 ĉi tien venis nur por bono,
 ke ĝi ĉe unu foj' ne lasu,
 ke duan fojon venu ĝi
 kaj trian fojon, tre tre klare,
 por ke mi kun certeco iru
 denove re en mian klostron.
 Mi benos Vin pro tio ĉi,
 Marian ĉiam laŭdos mi'.

La postan nokton, aŭdu vi,
 alpaŝis ŝin denove voĉo,
 kiu alvokis ŝin kaj diris:
 'Homo, postponas vi tro longe!
 Do iru re en vian klostron;
 do faru laŭ Mari-ordono!
 Mi 'stas sendito ŝia: kedu!'
 Do duan fojon ŝi perceptis
 voĉon kiu alvenis ŝin,
 instigan ke ŝi iru klostren.
 Nek tamen ŝi aŭdacis fari.
 La trian nokton ŝi atendis
 kaj diris: 'Se 'stas elfa monstro,
 kiu aperis antaŭ mi,
 do ke mi baldaŭ neniigu
 diablan forton kaj potencon;
 kaj se li venos en ĉi nokto,
 Sinjor', lin tiom konfuzigu,
 ke li forfuĝu el ĉi dom',
 ke li al mi neniom nocu.
 Maria, estu nun apude,
 se al mi voĉon sendas Vi,
 por ke mi iru en la klostron.
 Estrin', je via Ido petas
 mi, ke Vi trian fojon sendu'.

La trian nokton ŝi maldormis.
 El dia forto venis voĉo
 kun supergranda lumhelec'
 kaj diris: 'Tute ja ne taŭgas,
 ke vi ne agas laŭ l' ordono,
 ĉar per mi vin Maria vokas.
 Ho vi atendu ne tro longe!
 Nun iru klostron vi sen dubo;
 la pordoj staras larŭ-apertaj:
 vi povas paŝi laŭ elekto.
 Retrovos vi monaĥajn vestojn
 kuŝantaj ree sur l' altaro'.

Kiam la voĉo tion diris,
ne povis pekulin' kuŝanta
ĉi brilon per l' okul' toleri;
ŝi diris: 'Nun mi ne plu dubu:

ĉi voĉo venas ja de Dio,
 ĝi estas de Mari' sendito.
 Nun certas mi sen ajna dubo:
 ĝin akompanas hela brilo.
 Do nun mi ne postpones plu,
 mi iros re en mian klostron.
 Mi faros ĝin kun bona fido
 kaj per la ŝirmo de Maria,
 kaj ambaŭ miajn idojn ĉi
 konfidos mi al Patro Dio;
 Li nepre ilin save ŝparos'.
 Demetis ŝi, sen plu hezito,
 la vestojn, kiuj kovris ŝin,
 senbrue por ne vekti ilin.
 Ŝi ambaŭ kisis sur la buŝon,
 ŝi diris: 'Karaj, restu sanaj.
 Sub ŝirmo de Maria dolĉa
 mi lasas vin en bona fido;
 se Ŝi por mi ne grac-akiris,
 mi nepre ne forlasus vin,
 eĉ ne pro ĉiu riĉ' de Romo!'
 Nun aŭdu kion ŝi komencis!

Nun iris ŝi kun multaj larmoj
 ek al la klostro, tute sola.
 Kiam ŝi venis fruktarbejen,
 la pordojn trovis ŝi apertaj.
 Enpaŝis ŝi sen plua dubo:
 'Maria, kiom dankas mi!
 Mi estas re inter la muroj!
 Bonŝancon donu Dio plu'.
 Laŭ kie pasis ŝi, la pordoj
 larĝe apertaj 'stis por ŝi.
 Kaj la preĝejon ŝi eniris.
 Kaj tie kaŝe diris ŝi:
 'Ho Sinjor' Di', mi petas Vin,
 helpu pri ĉi monaĥa vesto,
 kiun mi antaŭ 14 jaroj
 kuŝigis sur Mari-altaro,
 la nokton, kiam fuĝis mi'.
 Mi tion nepre ne mensogas,
 mi diras ĝin tre serioze:
 la ŝuojn, frokon kaj vualon
 ŝi trovis, kie lasis ŝi,
 ekzakte je la sama loko.
 Surmetis ŝi tre haste ilin
 kaj diris: 'Dio de ĉielo
 kaj ho Maria, Virgulino
 dolĉa, benata ĉiam estu!
 Vi estas virto de l' floraro.
 En via pura virgineco
 Vi portis Idon sen dolor',
 kiu Sinjor' eterne estos.
 Vi estas elektita: kreis
 ĉielon, teron, via Filo.
 De Dio venas tiu povo

kiun Vi ade povos uzi:
Sinjoron, kiu al ni fratas,
ordoni povas Panjo Vi,
kaj Filin' kara Li Vin nomas.

Tre tio trankviligas min:
 kiu ĉe Vi petas pri graco,
 ĝin trovas, eĉ se estas tarde.
 Apogo via ege bonas.
 Estante trista kaj malgaja
 (ĉe Vi ja statas tiel ĉi)
 pro Vi mi rajtas esti ĝoja.
 Kun pravo mi benadas Vin!
 Ŝlosilojn de la sakristio
 ŝi vidis pendi -estas vere!-
 kie ŝi lasis, ĉe Maria.
 Ŝlosilojn do ŝi prenis kun si
 kaj iris al ĉorejo, kie
 lampojn ŝi vidis ĉie brili.
 Post tio prenis ŝi la librojn,
 dismetis tiujn laŭ sidlokoj,
 kiel antaŭe ŝi kutimis,
 Marian Virgulinon preĝis,
 ke tiu savu el malbono
 sin kaj l' infanojn, kiujn lasis
 ŝi en ĉagren' ĉe l' vidva hejmo.
 Kun tio pasis jam la nokto,
 kaj eksonoris la horloĝ',
 kiu indikis noktomezon.
 Ŝi sonoriloŝnuron prenis
 por plej ekzakta matutino,
 kaj ĉirkaŭaĵe ĉiuj aŭdis.
 Kiuj dormeje supre kuŝis,
 descendis ĉiuj sen malfru'
 de la dormej'. Pri l' okazaĵoj
 nek sciis granda nek malgranda.
 Tutvive restis ŝi en klostre
 sen riproĉindo, sen skandal':
 Maria anstataŭis ŝin
 precize kvazaŭ estus ŝi mem.
 Tiel ĉi pekulin' revenis,
 dank' al Maria, laŭdu Ŝin,
 la Virgolino de l' ĉielo,
 kiu senfine kun fidelo
 siajn amikojn asistadas,
 se tiujn ĝenas la mizer'.

La nobelino de l' rakonto
 'stas monaĥin' kiel antaŭe.
 Mi tamen volas ne forgesi
 ambaŭ infanojn, kiujn lasis
 ŝi en mizer' ĉe l' vidva hejmo
 kun mank' de mono, mank' de pano.
 Ne eblas plene elrakonti,
 kiam la panjo estis for,
 kiom da larmoj ili verŝis.
 Eksidis la vidvin' apude;
 kompatis ege ilin ŝi.
 Ŝi diris: 'Al la abatino
 ambaŭ infanojn prenos mi.
 Dio instigu ŝian koron,

por ke ilin bonfaru ŝi'.
Ŝi vestis ilin, laĉis ŝuojn,
kunprenis ilin al la klostro;
ŝi diris: 'Sinjorin', do vidu

mizeron de ĉi orfoj du:
 la panjo ilin en la nokto
 timplene lasis miadome
 kaj mem foriris sian vojon,
 ne scias mi pri la direkt'.
 Senhelpaj estas ĉi infanoj.
 Mi mem ne scias, kion fari'.
 La abatino ŝin respondis:
 'Vi tenu ilin, pagos mi,
 por ke vi ne malriĉon havu,
 ja viahejme ili loĝas.
 Pro Dio, ĉiutage oni
 por ili zorgos karitate.
 Do ĉiutage iu venu
 akcepti trinkon kaj manĝaĵon.
 Kaj se 'stas manko, diru ĝin'.
 Kaj tre gajiĝis la vidvino,
 ke jen solviĝis ĉio ĉi.
 Ŝi prenis ĉe si la infanojn
 kaj bone ilin vartis ŝi.
 La panjo, ilin mamnutrinta,
 kiu pri ili multe penis,
 sin sentis ja senpezigita,
 sciante ke ŝi ilin vartas,
 la idojn kiujn ŝi forlasis
 kun granda timo kaj dolor'.
 Ŝi do estonte ne plu zorgis
 nek timis plu pro la infanoj.
 Ŝi vivis nur sanktulan vivon.
 Multajn suferojn, multajn ĝemojn
 ŝi havis tage kaj dumnokte,
 ĉar en la koro kuĉis pento
 pri ŝiaj fiaj pektoj, kiujn
 ŝi ne kuraĝis ekrakonti
 al iu homo, nek malkovri,
 eĉ ne poeme sur paper'.

Post tio venis iun tagon
 abato, kiu ĉiujare
 ilin vizitis unufoje,
 por informiĝi ĉu ĉi tie
 estiĝis famo pri malbon',
 kiu damaĝus al la klostro.
 La tagon, kiam li alvenis,
 kuŝante preĝis sian preĝon
 en la ĥorej' la pekulino
 en ege granda kormalcerto.
 Diablo tentis, ke pro honto
 sian tre nekutiman pekon
 ŝi ne malkovru al l' abato.
 Kuŝante tiel en preĝado,
 ŝi vidis, kiel apud ŝi
 junulo paŝas blankvestita;
 enbrake li videble portis
 infanon, ŝajne mortis ĝi.
 Suprenjetadis la junulo

pomon, kiun li kaptis re:
por la infan' ĝi estis ludo.
La monaĥino vidis ĉion
tre klare, kuŝe en preĝado.

Ŝi diris: 'Ho amik', bonvolu,
 se do de Dio venis vi,
 je liaj Diroj mi vin petas,
 ke vi eldiru kaj ne kaŝu,
 kial vi ludas por l' infano
 per tiu bela ruĝa pom':
 enbrake kuŝas morta ĝi.
 Utilas via ludo ĝin ne'.
 'Vi pravas, monaĥino, certe:
 ne scias ĝi pri mia ludo,
 nek multe ja, nek eĉ malmulte;
 ĝi mortis, - aŭdas, vidas ne.
 Precize same Di' nescias,
 ke preĝas vi, ke fastas vi;
 ĝi tute ne efikas iom;
 perdita estas tiu peno,
 sencele vi punbatas vin;
 de pekoj tiom vi kovriĝis,
 ke Dio supre en ĉiel'
 neniom aŭdas el ĉi preĝoj.
 Do jen konsil': rapidu, ek!
 Al la abat', la patro, iru,
 kaj rakontadu al li plene,
 sen ajn mensogo, ĉiujn pekojn.
 Ne erarigu vin diablo.
 Pekliberigos la abato
 vin el ĉi pekoj vin ĝenantaj.
 Sed se vi ilin ne konfesos,
 pri ili venĝos akre Di'!
 Kaj malaperis la junulo,
 nenion plu al ŝi malkovris.
 Sed kion diris li, ŝi kaptis.
 Tial matene ege frue
 ŝi petis la abaton, ke li
 ŝian konfeson plenan aŭdu.
 Kaj saĝa estis la abato.
 Li diris: 'Ho filino kara,
 volonte tion faros mi.
 Bone pripensu, primeditu
 unue ĉiujn pekojn do'.
 Kaj ŝi je sama ĉi momento
 sidiĝis ce l' abato sankta,
 malkovris lin pri l' tuta vivo
 kaj ties vojo de l' komenc':
 kiel ŝin unu stulta amo
 nemezureble tentis, kaj
 kiel ŝi devis forkuŝigi
 monaĥan veston, ho kun tim'!,
 dumnokte sur Mari-altaro,
 por fuĝi l' klostron kun junulo,
 kiu generis du infanojn.
 Pri ĉio kion ŝi travivis,
 nenion ŝi menciis ne;
 ĉion, kion ŝi sciis kore,
 rakontis al abato ŝi.
 Post konfesado tute funda,

diris sankta patro, l' abat':
'Filino, mi pekliberigos
vin de la pekoj vin ĝenantaj,
kiujn al mi konfesis vi.

Benata kaj honoregata
 estu de Dio la Patrino!
 Ĉe tio li la manon metis
 al ŝi sur kap', absolvis ŝin.
 Li diris: 'En predik' publike
 vian konfeson diros mi,
 mi tiel zorge ĝin vortigos,
 ke vi kaj viaj idoj ne
 el ĝi, en kiu ajn ĉirkaŭo,
 ekhavas ĝenojn aŭ problemon.
 Ja estus fie, ĝin silenti,
 tiun miraklon, kiun Dio
 faris honore al la Panjo.
 Mi ĝin disdiros ĉie ajn.
 Esperas mi, ke konvertiĝos
 pluraj pekuloj pro ĝi tio,
 honore al Madono dolĝa'.

Al klostranaro li sciigis,
 antaŭ ol rehejmiĝis li,
 kion ĉi monaĥin' travivis;
 tamen neniu sciis, pri
 kiu temas; restis sekrete.
 L' abat' foriris, di-gvidate.
 Ambaŭ idojn de l' monaĥino
 kondukis kun si la abat'.
 Li vestis ilin per frok' griza,
 fariĝis ili du bonuloj.
 Ĉi panjo estis Beatrijs.
 Nun laŭdu Dion, Lin honoru,
 Marian ankaŭ, di-nutrintan,
 kiu miraklon verkis belan.
 Ŝi savis ŝin el la mizero.
 Ni ĉiuj preĝu, grandaj, etaj,
 aŭdante legi ĉi miraklon,
 por ke Maria por ni estu
 porpetantino en la valo,
 kie la mondon juĝos Dio.

Amen

iom pri kelkaj aliaj titoloj en la sama serio

Tertuliano - APOLOGIO. La unua grava verko latina pri Kristanismo, el la jaro 197 p.K. Fama pro siaj stilaj kaj lingvaj malfacilaĵoj, ĝi rebatas la falsajn akuzojn de la romia socio kontraŭ kristanoj, ĝi eksplikas kio estas Kristanismo, kaj prezentas frapan bildon pri la realeco de frukristana vivo.

Kenneth Twinn - UNITARIISMO. Tre klara, konciza prezento pri speco de Kristanismo, kiun la granda publiko nepre tro malmulte konas. La aŭtoro estas Unitaria pastro.

Gerrit Berveling - DIO/KRISTANISMO/ALIAJ RELIGIOJ. Tiu ĉi universitatnivela traktaĵo, farita en la kadro de la studo por iĝi Remonstranta pastoro, diskutas la ĉi-koncernajn tezojn de W. Cantwell Smith, donas historian superrigardon pri la ŝanĝiĝantaj sintenoj de kristanaj teologoj ekde la komenco ĝis la nuno rilate nekristanajn religiojn, kaj fine prezentas la pozicion de la aŭtoro en ĉi temaro. Bibliografio kaj glosaro kompletigas la tuton.

JAM TEMP' ESTA! La titolo (= jam estas tempo, vortludo kun Jam tempestas!) estas cito el praesperanta poemo de Zamenhof. Laŭ ni, ĉi frazero plej taŭgas por titoli ĉi broŝuron. Temas pri teksto, verkita de aro da sudafrikaj kristanoj el plej diversaj eklezioj. Ilin ege impresas la nuntempaj okazaĵoj en ilia lando suferanta, kaj surbaze de sia fido je Dio, ili provas interpreti la okazaĵojn teologie. Dokumenta nepre graveda je influoj por la estonto.